



## Hooseglunggi 2008

Am Birskeepfli fählt e Brugg  
Alli wänn'se wider zruugg  
Aber plaanig goot vvyll z'lang dasch nid normal  
Das wär doch aifach nimmsch d Genie  
Vom Militäär die baues yy  
Und alli faahre wider driiber sehr feudal  
E nei Brojäggt stellt sich jetz vor  
Dr Laggs kunnt zruugg in zwei drey Joor  
Die Idee loot mi nimm lugg  
Dä wär jo schnäller do als d Brugg

Goosch zem Hiiber uss go boschte  
Well's deert nid so vvyll duet koschte  
Wenn an Zoll kunnsch haist's was hänn si hit derby  
War fir nur 300 Frangge  
Die dien jo au by uns tangge  
Aber jetz isch's z'tiir dä Vortail isch verby  
Nur bym Lydel und bym Aldi  
Git's no Zyyg und zahlsch nur's Halbi  
Koch jo kai Flaisch vo d'uss hej Mamme  
Hesch nur no d Helfti in dr Pfanne

Seehn ihr jetz dä Helge doo  
Dä hämmer vor zwai Joor scho gnoo  
Well mer deert scho gseeh hänn was in Bärn so lauft  
Dä rooti Kärli in dr Mitti  
Benimmt sich wiene Lumpediti  
Es hett zem Glygg nyt gnutzt wemme Stimme kauft  
Die 6 Blauwysse ohni Gwisse  
Hänn dr Rooti welle bschisse  
Dä nimmt si Tschoobe und sy Hietli  
Und zieht sich zruugg uff's Albisgietli

E Baslerstab zem Ziirilai  
Y gang nid gärn vor dir in Gnai  
Aber wenny seeh was by dir so lauft  
Streetparade und Ziirifäscht  
By uns heersch nur brotäsch brotäsch  
Hesch d Rageete fir's Fesch vergäbe kauft  
Au s Tattoo hett das jo gmacht  
E huere Lärm die ganzi Nacht  
Y hoff an dr EM hett's nur Niete  
Die wuorde s Goalgschrei no verbiete

Wenn'y numme wisst wohär  
Kunnt das Vogellyysi här  
S Vogellyysi isch doch jetze Wäldbekannt  
Vom Bärneroberland oh jee  
Hochi Bärge tiefe Schnee  
Ainer wollte mal sie hielt ihn an dr Hand  
Thuner miesste das jo wisse  
Vor si's Vogellyysi kisse  
E Vogel isch doch do zem fliege  
Dängget was ir wänn – vvyll Vergniege

Am Concours Eurovision  
Finde nid alli dr Ton  
Dr DJ Bobo singt wie lätz - fir unser Land  
Au mit all deene Vampyyre  
Kenne si laider nid fyre  
Dr Oschte blogggt sen ab y find das allerhand  
Jetz wär dr richtigi Momänt  
Fir e ganz e nei's Talänt  
Es isch jo jetz e Blätzli frey  
Mir schigge d Micheline Calmy-Rey

Me mecht dr Hitzfäld angaschiere  
En andere wuurd sich nur blamiere  
Y main dr Lothar Matthäus vo dr ex Miss Schweiz  
Dr Lämmli drifft sich mit de Baide  
Ass sich Aine duet entschaide  
Dr Hitzfäld goot denn gly und sait das hätt sy Raiz  
Dr Lothar sait ych gang jetz au  
Är stoot uff und schnappt si Frau  
Mir geehn jetz Hai dasch nid zem lache  
Si muess no d Huusuffgoobe mache

Hesch Drooge gnoo muesch in Entzug  
Oder fliegsch im Flug by Zug  
Martina was hesch Du by deere Wärbig dänggt  
Ass nid kasch kochen isch frappant  
Jetz isch dy Kokskonsum bekannt  
E glaini Pulvermängi hett by Dir scho glänggt  
Du gisch's jo zue - hesch Pulver gnoo  
Und - was hesch jetz do drvoo  
Bisch denn Du e soo labil  
*Y ha doch maint es sig Persil*

Der Minu schrybt nimm in dr baz  
Als Tante Elsa vo sym Schatz  
Jetz hanny d baz abbstellt well mir si nimmi wänn  
Dr Traderaklatsch ligt in dr Äsche  
Jetz schrybt e neii Schnäädärsche  
Es fählt is ebbis aber nid nur wäge dämm  
Noochem lääse vorem penne  
Duen ych Zytige verbrenne  
Am Moorge merggy noochem schloofe  
S wird nimm so warm in unserem Oofe

Mit zwai Stägge sottsch go tschogge  
Statt wien ihr fuul umme hogge  
Well es haist jo wenn de Fit bisch - bisch au zwääg  
Z Mailand uff dr Laufstäägroute  
Lauft jo au kai diggi Pflute  
Die sin sicher mit zwai Stägge uff Wääg  
Wenn si denn seehsch - ummestolziere  
Wie si d Moode presäntiere  
Mien sich zwai Stägge konzentriere  
Ass si dr Dritti nid verliere

---

Wottschi au by uns bänggle ?  
Schigge doch aifach e Brief in unser Boschtfach  
VSG Postfach 4365 4002 Basel  
Oder goosch uff, [www.vsg-basel.ch](http://www.vsg-basel.ch)

---